

Hvatningarverðlaun velferðarráðs 2017

Lagt er til að velferðarráð samþykki að veita eftirtöldum Hvatningarverðlaun velferðarráðs fyrir árið 2017.

- **Edda Ólafsdóttir félagsráðgjafi, í flokksnum einstaklingar**
- **Stuðningsþjónustuteymi Miðgarðs, í flokksnum hópar/starfsstaðir.**
- **Fróðir foreldrar í flokksnum verkefni.**
- **Einnig er lagt til að Hrönn Egilsdóttir, ráðgjafi í Miðgarði og Jóna Kolbrún Halldórsdóttir, þjónustufulltrúi í Þjónustumiðstöð Laugardals og Háaleitis fái viðurkenningu fyrir farsælt starf á sviði velferðarmála.**

Greinargerð:

Velferðarráð veitti í fyrsta sinn hvatningarverðlaun árið 2011 í því skyni að hvetja starfsmenn sviðsins og hafa þau verið veitt árlega síðan. Velferðarráð skipaði valnefnd vegna veitingar verðlaunanna fyrir árið 2017. Valnefndin hefur verið skipuð skipuð fulltrúum velferðarráðs, skrifstofu velferðarsviðs, Starfsmannafélags Reykjavíkurborgar og BHM. Í valnefnd vegna verðlauna fyrir árið 2017 voru: Elín Oddný Sigurðardóttir, Gréta Björg Egilsdóttir, Garðar Hilmarsson og Anna Guðmundsdóttir. Ekki kom tilnefning í nefndina frá BHM þetta árið.

Til hvatningaverðlauna velferðarráðs 2017 var unnt að tilnefna einstakling, starfsstað, hóp og/eða verkefni til verðlauna fyrir eftirtektaverða alúð, þróun og/eða nýbreytni varðandi hvaðeina sem við kemur velferðarmálum og unnið var að á árinu 2017. Einnig mátti tilnefna einstakling fyrir farsælt starf á sviði velferðarmála og veita viðurkenningar fyrir athyglisverð verkefni.

Markmiðið með veitingu hvatningarverðlauna er að skapa hvetjandi vinnustaðamenningu og vekja athygli á gróskumiklu starfi í velferðarmálum Reykjavíkurborgar, auk þess að stuðla að aukinni nýbreytni og þróunarstarfi. Rannsóknir hafa sýnt að hvetjandi starfsumhverfi stuðlar að aukinni starfsánægju starfsmanna, betri frammistöðu og þjónustu til notenda.

Fjöl margar athyglisverðar tilnefningar bárust valnefndinni og valdi nefndin úr þeim tilnefningum sem bárust. Í heildina voru 30 einstaklingar, hópar eða verkefni tilnefnd, þar af voru 13 tilnefndir í flokksnum einstaklingar, átta tilnefndir í flokksnum hópar/starfsstaðir og níu tilnefndir í flokksnum verkefni.

Valnefnd hefur ákveðið að leggja til við velferðarráð að veita eftirfarandi hvatningarverðlaun fyrir árið 2017:

Í flokknum *einstaklingar* verði Eddu Ólafsdóttur veitt hvatningarverðlaun velferðarráðs 2017.

Í mati valnefndar og rökstuðningi þeirra sem tilnefndu Eddu til verðlauna kemur m.a. fram eftirfarandi:

Ég vil tilnefna Eddu Ólafsdóttur, félagsráðgjafa sem starfar á skrifstofu velferðarsviðs til hvatningaverðlauna. Tilnefninguna fær hún fyrir margra ára starf við að afla sér fagþekkingar á málaflokki innflytjenda, fræða samstarfsmenn á velferðarsviði og vekja athygli á þessum mikilvæga málaflokki. Edda hefur staðið fyrir vettvangsheimsóknum m.a. í útlöndum, fengið fræðimenn til landsins, sótt um styrki og aflað styrkja til að fræða og efla starfsmenn velferðarsviðs og hefur tekið þátt í erlendum samstarfsverkefnum. Eddu er mjög umhugað um að breiða út boðskap um gæða þjónustu fyrir einstaklinga sem kjósa að búa sér heimili í Reykjavík, hvort sem er um að ræða umsækjendur um alþjóðlega vernd, kvótaflóttafólk, flóttafólk eða aðra einstaklinga af erlendum uppruna sem vilja búa í Reykjavík. Edda er því sannarlega frumkvöðull á sínu sviði. Störf Eddu einkennast af metnaði og þrautseigju við að þróa og halda á lofti afar mikilvægri þjónustu við íbúa Reykjavíkur.

Í flokknum *hópar/starfsstaðir* verði hvatningarverðlaun velferðarráðs 2017 veitt Stuðningsþjónustuteymi Miðgarðs.

Í Miðgarði er starfandi teymi sem sinnir ráðgjöf og stuðningi við börn og fjölskyldur þeirra inni á heimilum þeirra sem utan. Þau hafa sýnt frumkvæði og alúð öllum sínum störfum og hafa þannig fyrirbyggt stærri vanda hjá fjölskyldum. Forvarnargildið í störfum þeirra er mikið. Þau eru í miklu samstarfi við aðra starfsmenn í Miðgarði og eru mikilvægur hlekkur í starfi með fjölskyldum. Verkefnið útivist og virkni er hópastarf fyrir ungmenni í Miðgarði og er útfærslan á úrræðinu persónuleg ráðgjöf. Ragnar og Sigurgeir hafa þróað hópastarfið undanfarin ár. Sigríður Ella bættist við í hópinn haustið 2016. Verkefnið er byggt á hugmyndafræði ævintýrameðferðar. Áhersla er á félagsfærni, samskipti, áskoranir og útivist. Tilgangurinn er að auka félagslega færni ungmenna, draga úr neikvæðri og andfélagslegri hegðun, að ungmennið öðlist reynslu af heilbrigðum lífsháttum, efli sjálfsstjórn og styrki jákvæða eiginleika og hæfileika sína, styrki tengsl og bæti samskipti á milli unglings, foreldra, fjölskyldu og annarra í nærumhverfi. Starfsmenn teymisins eru Ragnar Harðarson, Sigurgeir Birgisson, Sigríður Ella Jónsdóttir, Ingrida Induse, Nína Jacqueline Backer og Hrönn Egilsdóttir.

Í flokknum *verkefni* verði verkefninu Fróðir foreldrar veitt hvatningarverðlaun velferðarráðs 2017.

Fróðir foreldrar er samstarfsverkefni foreldrafélaga grunnskóla í Vesturbæ, Miðborg og Hlíðum, frístundamiðstöðvarinnar Tjarnarinnar og ungmennaráða Vesturbæjar, Miðborgar og Hlíða. Markmið verkefnisins eru fjögur:

- Að rödd foreldra og ungmenna innan skólasamfélags hverfanna heyrist
- Að virkja samtakamátt foreldra sem mikilvægan þátt í forvörnum í uppeldi barna
- Að nýta mannauð hverfanna og tengja við nærsamfélagið
- Að standa fyrir fræðslukvöldum byggð á óskum og hugmyndum forelda í hverfunum

Þetta er skemmtilegt og fróðlegt verkefni sem sett var af stað af þvílíkri elju og ástríðu. Verkefnið byggist á að miðla ýmiss konar fræðslu til foreldra og hafa verið haldin fjölmörg fræðslukvöld. Viðfangsefni fræðslukvöldanna hafa verið valin út frá skoðanakönnun sem send var á foreldra, börn og ungmenni í hverfunum. Á grunni þeirra svara voru lögð drög að fræðsluáætlun. Frá upphafi var lögð áhersla á að Fróðir foreldrar nýttu þá miklu þekkingu og reynslu starfsfólks sem starfa með börnum og unglingum í hverfunum. Öllum fræðslukvöldum hefur verið streymt í beinni útsendingu á heimasíðu Reykjavíkurborgar sem margfaldar aðgengi foreldra að fræðslukvöldunum auk þess sem þau hafa verið aðgengileg á neti eftir að þeim lýkur. Þau sem að verkefninu koma hafa sannarlega náð þeim markmiðum sem sett voru upp í upphafi og það með glans. Eins má hrósa þeim fjölmörgu fyrirlesurum sem komið hafa að þessu verkefni og skilað sínu af stakri snilld. Þetta samstarfsverkefni er hugsað fyrir foreldra barna í grunnskólum þessara hverfa sem að verkefninu koma.

Jafnframt er lagt til að Jónu Kolbrúnu Halldórs, þjónustufulltrúa og Hrönn Egilsdóttur, ráðgjafa verði veitt viðurkenning fyrir farsælt starf á sviði velferðarmála.

Í mati valnefndar og rökstuðningi þeirra sem tilnefndu Jónu Kolbrúnu kemur m.a. fram eftirfarandi:

Jóna hefur starfað hjá Reykjavíkurborg í rúmlega 20 ár og er nú á vormánuðum 2018 að ljúka störfum sökum aldurs. Verkefni Jónu hafa þróast í gegnum árin en í dag eru hennar helstu verkefni umsjón með greiðslum fjárhagsaðstoðar til notenda þjónustumiðstöðvarinnar auk allra almennra þjónustustarfa. Jóna er samviskusamur starfsmaður sem sinnir vinnunni sinni af alúð og metnaði. Það verður mikill missir að sjá á eftir þeim mannauð sem Jóna býr yfir. Við teljum hana því eiga skilið að hljóta hvatningaverðlaun velferðaráðs vegna einstakrar alúðar í starfi sl. 20 ár.

Í mati valnefndar og rökstuðningi þeirra sem tilnefndu Hrönn kemur m.a. fram eftirfarandi:

Ég ætla að tilnefna Hrönn Egilsdóttur sem er starfsmaður í Stuðningnum heim í Miðgarði þjónustumiðstöð til hvatningaverðlaunanna árið 2017. Hrönn er búin að vinna óeigingjarnt starf á vegum velferðarmála hjá borginni í yfir 20 ár. Hún brennur fyrir velferð barna og fjölskyldna þeirra og sinnir sínu starfi 100% og rúmlega það. Hún hefur verið að sinna flestum málum á ári miðað við aðra sem sinna sömu vinnu og hún. Hrönn er einstaklega

hjartahlý en á sama tíma kröfuhörð við sína skjólstæðinga. Hún er fyrirmynd fyrir aðra sem vinna sambærileg störf.